

265.

Na osnovu Amandmana LI tačka 5. stav 3. na Ustav Republike Bosne i Hercegovine, Predsjedništvo Republike Bosne i Hercegovine, na prijedlog Vlade Republike Bosne i Hercegovine, donosi

UREDBU SA ZAKONSKOM SNAGOM O MUZEJSKOJ DJELATNOSTI

I – OSNOVNE ODREDBE

Član 1.

Ovom uredbom uređuje se muzejska djelatnost koja obuhvata: sistematsko istraživanje, prikupljanje, stručnu i naučnu obradu, čuvanje, zaštitu i prezentiranje muzejskog materijala.

Član 2.

Muzejski materijal obuhvata: proizvode prirode; proizvode ljudskog rada i duha; predmete, dokumente i druga svjedočanstva o pojavama i procesima u društvu, istorijskim zbivanjima, kulturnom, naučnom, političkom, ekonomskom i tehničkom razvoju, životu i običajima ljudskih zajednica, životu i djelu istaknutih ličnosti, kao i druge predmete koji svjedoče o razvoju prirode i društva od praistorije do danas.

Član 3.

Muzejska djelatnost je djelatnost od posebnog društvenog interesa.

Član 4.

Muzejsku djelatnost obavlja muzej i galerija (u daljem tekstu: muzej).

Muzejsku djelatnost obavlja i muzejska zbirka, a određene poslove muzejske djelatnosti obavlja muzejska izložba.

Član 5.

Muzejska djelatnost finansira se u skladu sa Zakonom o finansiranju potreba i interesa društva u oblasti kulture („Službeni list SRBiH“, broj 39/90).

Član 6.

Na muzej se primjenjuje Uredba sa zakonskom snagom o ustanovama („Službeni list RBiH“, br. 6/92 i 8/93), ako ovom uredbom nije drugačije određeno.

II – MUZEJSKI MATERIJAL

Član 7.

Muzej pribavlja muzejski materijal prikupljanjem na terenu, iskopavanjem, kupovinom, razmjenom, poklonom i zavještanjem.

Ugovor o kupovini, razmjeni i poklonu muzejskog materijala sastavlja se u pismenom obliku.

Član 8.

Muzejski materijal stručno se i naučno obrađuje primjenom savremenih metoda u obradi muzejskog materijala.

Član 9.

Zaštita i korišćenje muzejskog materijala, kao dobra kulturno-istorijskog nasljeđa, uređuje se Zakonom o zaštiti i korišćenju kulturno-istorijskog i prirodnog nasljeđa („Službeni list SRBiH“, br. 20/85 i 12/87 i „Službeni list RBiH“, broj 3/93).

Član 10.

Strano pravno ili fizičko lice može istraživati i prikupljati muzejski materijal na teritoriji Republike Bosne i Hercegovine (u daljem tekstu: Republika), pod uslovom da to istraživanje i prikupljanje obavlja u saradnji sa odgovarajućim muzejom u Republici.

Za istraživanje i prikupljanje iz stava 1. ovog člana muzej sa kojim strano pravno ili fizičko lice saraduje dužno je pribaviti prethodnu saglasnost Ministarstva obrazovanja, nauke, kulture i sporta.

Član 11.

Muzejski materijal može se izuzetno rashodovati na osnovu prijedloga stručne komisije koju obrazuje upravni odbor muzeja, u skladu sa pravilima muzeja.

Član 12.

U slučaju prestanka rada muzeja osnivač muzeja će odrediti muzej ili drugo pravno lice koje će preuzeti muzejski materijal muzeja koji prestaje sa radom.

III- MUZEJ

Član 13.

Muzej je ustanova u oblasti kulture koja obavlja muzejsku djelatnost.

Član 14.

Muzej se može osnovati i početi da obavlja djelatnost ako je obezbijeđen odgovarajući muzejski materijal, prostorije i oprema za obavljanje muzejske djelatnosti, potreban broj stručnih muzejskih radnika i sredstva za osnivanje i početak rada muzeja.

Bliže uslove iz stava 1. ovog člana utvrđuje ministar obrazovanja, nauke, kulture i sporta (u daljem tekstu: ministar).

Član 15.

Muzej može trajno obavljati djelatnost ako ispunjava uslove utvrđene Normativima i standardima za muzejsku djelatnost, u skladu sa Zakonom o finansiranju potreba i interesa društva u oblasti kulture.

Uslove iz stava 1. ovog člana muzej je dužan da ispuni najkasnije u roku od dvije godine od dana početka obavljanja djelatnosti.

Član 16.

Muzej:

- istražuje, prikuplja i obrađuje muzejski materijal,
- čuva muzejski materijal od oštećenja, uništenja i nestajanja,
- obezbjeđuje mjere zaštite muzejskog materijala, posebno za vrijeme ratnog ili vanrednog stanja,
- obezbjeđuje korišćenje muzejskog materijala u kulturne, naučne, vaspitno-obrazovne i druge svrhe putem njegovog prezentiranja u okviru stalnih ili povremenih izložbi i na drugi način,
- omogućava naučnim i stručnim radnicima proučavanje muzejskog materijala,
- brine se o čuvanju i održavanju muzejskog materijala koji se nalazi van muzeja na području na kojem obavlja svoju djelatnost,
- obavlja naučnoistraživački rad u skladu sa zakonom,
- objavljuje rezultate svog stručnog i naučnoistraživačkog rada putem vlastitih publikacija i na drugi način,
- ostvaruje međunarodnu saradnju u oblasti muzejske djelatnosti,
- obavlja i druge poslove utvrđene zakonom i pravilima muzeja.

Član 17.

Muzejom upravlja upravni odbor.

Pored poslova utvrđenih u članu 27. Uredbe sa zakonskom snagom o ustanovama, upravni odbor muzeja:

- odobrava projekte iskopavanja, istraživanja i prezentacije muzejskog materijala,
- daje saglasnost na razmjenu muzejskog materijala,
- nalaže preduzimanje posebnih mjera za čuvanje i zaštitu muzejskog materijala.

Član 18.

Muzejom rukovodi direktor.

Za direktora muzeja može biti imenovano lice koje ima visoku stručnu spremu iz oblasti kojom se muzej bavi i istaknuti je stručnjak u muzejskoj djelatnosti, naučni ili kulturni radnik.

Bliži uslovi za imenovanje direktora muzeja utvrđuju se pravilima muzeja.

Direktor muzeja imenuje se za vrijeme od četiri godine i može biti ponovo imenovan.

Član 19.

Stručne poslove muzejske djelatnosti obavljaju muzejski radnici koji imaju odgovarajuću stručnu spremu i stručno zvanje.

Bliži propis o stručnim zvanjima, uslovima i načinu sticanja stručnih zvanja u muzejskoj djelatnosti donosi ministar, po prethodno pribavljenom mišljenju muzeja iz člana 25. stav 1. ove uredbe.

Član 20.

Pravno ili fizičko lice koje ima muzejski materijal može osnovati muzejsku zbirku ili muzejsku izložbu.

Odredbe ove uredbe shodno se primjenjuju na muzejsku zbirku i muzejsku izložbu ako se osniva kao ustanova.

Član 21.

Muzejska zbirka istražuje, prikuplja, stručno i naučno obrađuje, čuva i prezentira muzejski materijal.

Muzejska izložba prezentira muzejski materijal koji se odnosi na određenu temu, period, djelatnost, događaj, instituciju ili ličnost.

Član 22.

Muzeji se, radi obavljanja poslova od zajedničkog interesa, mogu udruživati na osnovu ugovora u zajednicu muzeja ili drugi oblik udruživanja.

O udruživanju iz stava 1. ovog člana odlučuje upravni odbor muzeja.

Član 23.

Muzej obavještava javnost o programima istraživanja, stalnim i povremenim izložbama i značajnim otkrićima, na način utvrđen pravilima muzeja.

Član 24.

Muzej vodi sljedeće evidencije: ulaznu i izlaznu knjigu, knjigu inventara, knjigu poklona, kartoteku i fototeku muzejskog materijala.

Bliži propis o sadržaju i načinu vođenja evidencija iz stava 1. ovog člana donosi ministar.

IV – MUZEJI OD JAVNOG INTERESA ZA REPUBLIKU

Član 25.

Zemaljski muzej Bosne i Hercegovine, Istorijski muzej Bosne i Hercegovine, Muzej književnosti i pozorišne umjetnosti Bosne i Hercegovine i Umjetnička galerija Bosne i Hercegovine (u daljem tekstu: muzeji od javnog interesa za Republiku) nastavljaju rad kao javne ustanove koje obavljaju muzejsku djelatnost u javnom interesu Republike. Prava osnivača prema muzejima od javnog interesa za Republiku vrši Skupština Republike Bosne i Hercegovine.

Član 26.

Muzeji od javnog interesa za Republiku, pored poslova utvrđenih u članu 16. ove uredbe, obavljaju i matične poslove muzejske djelatnosti u određenim oblastima, i to:

- Zemaljski muzej Bosne i Hercegovine u oblasti arheologije, etnologije, biologije i geologije,
- Istorijski muzej Bosne i Hercegovine u oblasti istorije Bosne i Hercegovine od srednjeg vijeka do danas,
- Muzej književnosti i pozorišne umjetnosti Bosne i Hercegovine u oblasti književnosti i pozorišne umjetnosti,
- Umjetnička galerija Bosne i Hercegovine u oblasti likovne umjetnosti.

Član 27.

Matični poslovi muzejske djelatnosti su:

- vođenje centralnog kataloga muzejskog materijala iz odgovarajućih oblasti,
- razvijanje i unapređivanje stručnog rada muzeja iz odgovarajuće oblasti, obavljanje stručnog nadzora i pružanje stručne pomoći,
- staranje o stručnom usavršavanju muzejskih radnika.

Član 28.

Muzeji su dužni da odgovarajućem matičnom muzeju dostavljaju obavještenja i podatke potrebne za obavljanje matičnih poslova.

Član 29.

Nadzor nad zakonitosti rada muzeja od javnog interesa za Republiku vrši Ministarstvo obrazovanja, nauke, kulture i sporta.

V – KAZNENE ODREDBE

Član 30.

Novčanom kaznom od 80.000 do 120.000 dinara kazniće se za prekršaj muzej, ako:

1. ne zatraži prethodnu saglasnost za istraživanje i prikupljanje muzejskog materijala koje vrši strano pravno ili fizičko lice (član 10. stav 2);
2. rashoduje muzejski materijal suprotno odredbi člana 11. ove uredbe;
3. ne vodi ulaznu knjigu i izlaznu knjigu, knjigu inventara, knjigu poklona, kartoteku i fototeku muzejskog materijala (član 24);
4. ne dostavi matičnom muzeju obavještenja i podatke potrebne za obavljanje matičnih poslova (član 28).

Za prekršaj iz stava 1. ovog člana kazniće se i odgovorno lice u muzeju novčanom kaznom od 15.000 do 25.000 dinara.

VI – PRELAZNE I ZAVRŠNE ODREDBE

Član 31.

Postojeći muzeji dužni su da:

- usklade svoju organizaciju i djelatnost sa odredbama ove uredbe i donesu pravila muzeja, u roku od šest mjeseci od dana njenog stupanja na snagu,
- obezbijede uslove za trajno obavljanje djelatnosti utvrđene Normativima i standardima za muzejsku djelatnost, u roku od tri godine od dana stupanja na snagu ove uredbe.

Član 32.

Za vrijeme ratnog stanja Skupština Republike Bosne i Hercegovine zadržava prava i obaveze osnivača prema Muzeju Bosanske krajine Banja Luka, Muzeju Hercegovine Mostar, Regionalnom muzeju Doboj i Muzeju istočne Bosne Tuzla.

Član 33.

Postojeći muzeji koji su osnovani za obilježavanje određenog istorijskog događaja ili ličnosti mogu nastaviti rad kao odjeljenje, zbirka ili izložba odgovarajućeg regionalnog muzeja, zavičajnog muzeja ili Istorijskog muzeja Bosne i Hercegovine.

Član 34.

Skupština Republike Bosne i Hercegovine odnosno skupština opštine ili skupština gradske zajednice odlučice o zadržavanju odnosno preuzimanju prava i obaveza osnivača prema muzejima iz člana 32. ove uredbe i drugim muzejima, shodno odredbama čl. 61, 62. i 63. Uredbe sa zakonskom snagom o ustanovama, u roku od tri mjeseca od prestanka ratnog stanja.

Član 35.

Ministar će donijeti bliže propise iz člana 14. stav 2, člana 19. stav 2. i člana 24. stav 2. ove uredbe, u roku od tri mjeseca od dana stupanja na snagu ove uredbe.

Do donošenja propisa iz člana 24. stav 2. ove uredbe primjenjivaće se Pravilnik o načinu vođenja ulazne knjige, knjige inventara i kartoteke muzejskog materijala („Službeni list SRBiH“, broj 23/78).

Član 36.

Danom stupanja na snagu ove uredbe prestaju da važe: Zakon o muzejskoj djelatnosti („Službeni list SRBiH“, br. 6/76 i 12/87), Zakon o Zemaljskom muzeju Bosne i Hercegovine („Službeni list SRBiH“, broj 20/77), Zakon o Muzeju revolucije Bosne i Hercegovine („Službeni list SRBiH“, broj 20/77), Zakon o Muzeju književnosti i pozorišne umjetnosti Bosne i Hercegovine („Službeni list SRBiH“, broj 20/77) i Zakon o Umjetničkoj galeriji Bosne i Hercegovine („Službeni list SRBiH“, broj 20/77).

Član 37.

Ova uredba stupa na snagu danom objavljivanja u „Službenom listu RBiH“.

PR broj 1519/93
2. juna 1993. godine
Sarajevo

Predsjednik
Predsjedništva RBiH,
Alija Izetbegović, s. r.